

■ GLOSSA

Vegnan ils umens adina pli curius?

DA BARBLA ETTER

Chars umens, betg legjai vinavant. Vus na vegnis betg ad esser intgantads. Ma jau vi tuttina scriver in pèr lingias davart in tema che m'occupa e ch'è permanentamain actual – e quel tema èn ils umens, charas lecturas. L'ultim temp hai jau emprendì d'enconuscher divers umens speziels. Speziels? N'è quai betg ina caratteristica fascinanta?

Bain! Ma il cunfin tranter esser spezial ed esser memia spezial è fitg stretg. In exempel è Harry*. El ha fatg in studi ed ha uss ina piazza nua ch'el gudogna bler, segir il tripel da mai. Ma el spargna ad in spargnar: El viva en in studio, va a tut ils aperos pussaivels e maglia là giuaden tut quai ch'el po. Quai spargna puspè ina tschaina. Sia firma porscha als collavuratur abunaments generals (AG) d'emprima classa per il tren. E sche nagin na dovra quels per la lavur la fin d'emna pon ils collavuratur als duvrar per lur temp liber. Il hobi da Harry è il sport, l'enviern fa el passlung.

Ultimamain m'ha Harry communitgà ch'el survegnia la fin d'emna quest AG e che nus possian far ina tura da passlung en il Giura. Pertge betg? Il Giura è in siemi per far



passlung ed jau hai proponì che nus possian durmir a La Brévine. Jau enconuschia là in patgific hotel. Sin quai Harry tut schocà: «Tge, hotel? Nus giain sa chapescha a bivacar! Jau na stun betg uschia sin hotels steris.»

Ed jau na stun betg uschia sin bivacar da temperaturas sut minus ventg! Harry schon, el prenda er adina cun sai ses equipament da far camping, er en l'emprima classa dal tren. Ed el n'ha naginas retegnientschas da cuschinar là sin ses buglieder da gas in café.

In bun collega da Harry è Hans. Er el ha quest tic da spargnar: Cumbain ch'el è già 40, viva el anc a chasa. Ultimamain al hai jau dumandà pertge ch'el spargnia en tala maniera. La resposta: «Forsa vegn in di la dretga ed alura èn ins cuntent dad avair mess insatge da la vart.» Sch'el fiss

en quel cas pront da dar ora dapli è tut in'otra dumonda.

Forsa è tut mo ina chaussa da la percepziun e forse hai jau ina percepziun dad umens disturbada. Ma mes maletg dad umens ha patì fermamain il davos onn. Per megliar quel sun jau stada cun trais umens ed in'amia en vacanzas. E guarda qua: Nagut spezial n'è capità. Els ma parevan normals e mes maletg è puspè sa megliarà.

Ed alura sun jau ida puspè ina giada a gentar cun Herbert. El è in fan dal budissem. Quai chat jau en urden, ma sch'el meditescha duas minutas si per sia pizza suenter avair ditg «bun appetit» na sai jau betg propi tge far. Ora mai entschaver a mangiar. Herbert m'ha alura quintà plain superbia da ses nov telefonin, in smartphone. – Aha. – Alura ha el prendì or da giaglioffa quel e musà tut las funcziuns e quintà quant pauc ch'el irradiescha e tut ina giada dumonda el: «Vuls ina giada tutgar el?»

Jau hai stuì rir, forse ina reacziun betg dal tuttafatg adequata. Ma tge avess jau stuì responder, charas lecturas? Gugent spetg jau Vossas respostas:

barbla@gmx.ch

* Ils nums èn midads, las episodas propi capitadas.